

दिनांक : 24.07.2026

समय : 18.45 बजे

- नीट पेपर लीक प्रदर्शन मामला माथे कॉकरोच जनता पार्टी रा नुमाइंदा केन्द्रीय मंत्री जे.पी. नड्डा ऊं मिल्या— संसद मांय ई अडचन जारी।
- केन्द्रीय मंत्रिमण्डल देश मांय तीन केमिकल पार्क बणावण सारू भव्य रसायन योजना ने मंजूरी दीनी।
- राज्यपाल हरिभाऊ बागडे नशा री लत ने जड़ ऊं खत्म करण सारू महीनाभर रो खास अभियान चलावण रा हुकम दीना।
- राज्य रा ऊगणी अर लंकाऊ हलकां मांय आवता दो दिन कठे कठे जबरदस्त बारिश रा आसार— मौसम विभाग काल प्रदेश रा सगळा जिलां मांय बरसात सारू चेतायो।

000

स्वास्थ्य मंत्री जेपी नड्डा अर केंद्रीय मंत्री जितेंद्र सिंह समेत भाजपा रा केई नेतावां अर कॉकरोच जनता पार्टी—सीजेपी रा नुमाइन्दां बीचे आज नई दिल्ली मांय दूजा दौर री मीटिंग व्ही। न्यारी—न्यारी परीक्षावां मांय कथित गडबडियां रे खिलाफ नौजवानां री अगुवाई मांय कर्या जा रह्या विरोध प्रदर्शनां बीचे आ बातचीत करी ज्यी। सीजेपी रा नुमाइन्दा सौरभ दास, आशुतोष रांका, अभिजीत दिपके अर दीपक बलियान शांति सागे प्रदर्शन करण वाळां रे खिलाफ कोई कानूनी कार्यवाही नी करण अर हाल ही मांय व्ही परीक्षावां मांय गडबडियां रो नुकसाण झेल रह्या विद्यार्थियां रा पिरवारां ने मुआवजो देवण री शर्ता सरकार कानी ऊं मान्यां पाछे बातचीत री सहमति जताई। खबरनवीसां सागे बातचीत करता थकां स्वास्थ्य मंत्री जे.पी. नड्डा कह्यो के सरकार काल प्रतिनिधिमंडल सागे एक और दौर री चर्चा करेला।

000

सुप्रीम कोर्ट केंद्र सरकार अर राष्ट्रीय परीक्षा एजेंसी—एनटीए ने नीट—यूजी पेपर लीक मामला पाछे सुधार लागू करण रा काम ऊं जुड़्यो हलफनामो दाखिल करण रा हुकम दीना है। न्यायमूर्ति पी.एस. नरसिम्हा अर न्यायमूर्ति आलोक आराधे री पीठ ई मामला री सुणवाई करता थकां कह्यो के हलफनामा मांय सुधारां ने संस्थागत रूप देवण सारू करी ज्या जतन री साफ जाणकारी देवणी चाहिजे। पीठ कह्यो के वां ई मामला मांय करडी निगरानी राखता थकां लगातार इण रो जायजो लेवेला। ई मामला मांय आगली सुणवाई 27 जुलाई ने व्हेला। ई बीचे केंद्रीय संसदीय कार्य मंत्री किरें रिजिजू कह्यो है के प्रधानमंत्री नरेंद्र मोदी परीक्षावां मांय गैर—वाजिब साधन काम लेवण ऊं रोकण सारू करडो बिल लावण मांय कोई मोड़ो नी करण माथे जोर दीनो है। संसद परिसर मांय खबरनवीसां सागे बातचीत करता थकां रिजिजू कह्यो के देश री ई आ ही मर्जी है अर ओ बिल पास व्हेवण मांय कोई अडचन नी आवणी चाहिजे। वे कह्यो के सरकार विद्यार्थियां रो भविष्य सुरक्षित राखण सारू केई खास जतन कर रही है। रिजिजू कह्यो के गर विपख ई मुद्दा माथे संसद री कार्यवाही मांय अडचन पैदा करेला तो वां ने देश रा नौजवानां री रीस रो सामो करणो पड़ेला।

ई बीचे कानून मंत्री अर्जुन राम मेघवाल पेपर लीक ऊं जुड़्या मामलां री सुणवाई सारू फास्ट ट्रैक कोर्ट बणावण रा प्रधानमंत्री नरेन्द्र मोदी रा फैसला री सराहवणा कीनी है। खबरनवीसां सागे बातचीत करता थकां वे कह्यो के आं अदालतां मांय मामलां री सुणवाई रोजीना व्हेला।

000

संसद रा दोन्यू सदनां मांय आज लगातार 5 वां दिन हंगामो व्ह्यो। नीट पेपर लीक मामला अर दूजा मुद्दां माथे चर्चा री मांग ने ले र विपख रा सदस्यां रा शोर—शराबा बीचे लोकसभा अर राज्यसभा री कार्यवाही बार—बार टाळणी पड़ी। ई पाछे दोन्यू सदनां री कार्यवाही सोमवार ताई टाळ दीरीजी। लोकसभा री कार्यवाही सरू व्हेतां ही संसदीय कार्य मंत्री किरें रिजिजू कह्यो के सरकार सत्र रा पहला दिन ऊं ई नीट पेपर लीक मामला माथे चर्चा सारू तैयार ही पण विपख बिना ठोस शर्त चर्चा मांय शामिल नी व्हे रह्यो है। राज्यसभा मांय विपख रा शोर—शराबा बीचे गृह राज्य मंत्री नित्यानन्द राय वन्दे मातरम् बिल पेश कीनो।

000

प्रधानमंत्री नरेन्द्र मोदी री सदरत मांय आज केन्द्रीय मंत्रिमण्डल री माली मामलां री समिति री मीटिंग व्ही। इण मांय प्रधानमंत्री गतिशक्ति, राष्ट्रीय मास्टर प्लान रा तैत रेल नेटवर्क बधावण सारू 1 हजार 264 करोड़ रुपया री मल्टीट्रेकिंग परियोजना ने मंजूरी दीरीजी। केन्द्रीय मंत्री अश्विनी वैष्णव खबरनवीसां ने मीटिंग मांय करी ज्या खास—खास फैसलां री जाणकारी दीनी। वे बतायो के मंत्रिमंडल देश मांय तीन समर्पित रासायनिक पार्क बणावण सारू **भारत औद्योगिक विकास रसायन— भव्य रसायन योजना** ने मंजूरी दीनी। ई योजना रो ऐलाण चालू माली साल रा केंद्रीय बजट मांय करी ज्यो हो। ई रा तैत तीन प्लग एण्ड प्ले केमिकल पार्क बणाया जावेला।

000

मुख्यमंत्री भजन लाल शर्मा पाणी भेळो करण माथे जोर दीनो है। वे आज जयपुर मांय राख्खी ज्या राजस्थान राजस्थान वाटर कॉन्क्लेव मांय बोल रह्या हा। वे कह्यो के नुवा-नुवा काम कर र राजस्थान पाणी रा प्रबन्धन रा हलका मांय राष्ट्रीय मॉडल बणेला। वे कह्यो के पाणी रा बेहतर प्रबन्धन अर हर घर ताई पाणी पूगावण माथे सरकार रो खास ध्यान है। मुख्यमंत्री कह्यो के राम जल सेतु लिंक परियोजना, ऐतिहासिक यमुना जल समझौता अर नर्मदा अवार्ड समझौता ऊँ राज्य मांय पाणी री उपलब्धता तैय करण रा नुवा दौर री सरुआत व्ही है।

000

प्रदेश मांय नशा री लत ने जड़ ऊँ खत्म करण सारु खास अभियान चलायो जावेला। राज्यपाल हरिभाऊ बागडे नशा मुक्ति अभियान ने असरदार तरीका ऊँ लागू करण अर ई सारु कार्य योजना रो जायजो लेवण सारु आज जयपुर मांय राख्खी ज्यी मीटिंग मांय महीना भर रो खास अभियान चलावण बाबत् हुकम दीना। वे कह्यो के नशा मुक्ति सारु हर लेवल माथे जवाब तैय करी जावणी चाहिजे। श्री बागडे कह्यो के विश्वविद्यालयां मांय ई नशीली चीजां काम लेवण वाळां रे खिलाफ करडी कार्रवाई करी जावणी चाहिजे। वे सरहदी हलकां मांय ड्रोन रे ज़रिये नशीली चीजां भेजण माथे चिन्ता जताता थकां इण ने रोकण सारु असरदार कार्यवाही करण बाबत् कह्यो।

000

चिकित्सा मंत्री गजेन्द्र सिंह खींवर आज कोटपूतली रा सरकारी बी.डी.एम. अस्पताल रो दौरो कर र व्यवस्थावां रो जायजो लीनो। चिकित्सा मंत्री न्यारा-न्यारा वार्ड रो दौरो कर र सुबीता देख्या अर अहलकारां सागे मीटिंग कर र हालात रो जायजो लीनो। वे कह्यो के अस्पतालां मांय डॉक्टरां री कमी नी व्हेवणी चाहिजे। ई सागे ई बेहतर ईलाज रा सुबीता सारु साधनां री कमी ई नी व्हेवणी चाहिजे।

ई बीचे बांसवाड़ा रा महात्मा गांधी ज़िला अस्पताल मांय आज घणा जोखिम सागे आस वाळी महिलावां रा सुबीता सारु प्रसव सखी व्यवस्था सरु करीजी।

000

राजस्थान राज्य अन्य पिछड़ा वर्ग आयोग अन्य पिछड़ा वर्ग ऊँ जुड़्या पिरवारां रा राजनैतिक प्रतिनिधित्व संबंधी सर्वे री आखिरी तारीख बधा र 26 जुलाई कर दीनी है। आयोग रा सचिव अशोक कुमार जैन ई बारा मांय सगळा ज़िला कलेक्टरां ने निर्देश जारी कर र सर्वे पूरो करण सारु कह्यो है। ध्यानजोग है के राजधारा सर्वे मोबाइल एप रे जरिये 10 जुलाई ऊँ सरु करी ज्यो सर्वे रो काम 23 जुलाई ताई करीब 70 फीसदी ई पूरो व्हे सक्यो है, जिण ने ध्यान राखता थकां सर्वे री मियाद बधायी ज्यी है। ई बीचे नगरीय विकास अर स्वायत्त शासन मंत्री झाबर सिंह खर्वा भीलवाड़ा मांय खबरनवीसां सागे बातचीत करता थकां कह्यो के राज्य सरकार रा लेवल माथे निकाय चुनाव करावण ऊँ जुड़्यो काम पूरो कर लियो ज्यो है।

000

राज्य रा ऊगणी अर लंकाऊ-ऊगणी हलकां मांय भारी ऊँ घणी भारी बिरखा रा आसार है। मौसम विभाग आवता दो दिन मांय कोटा, भरतपुर अर जयपुर संभाग मांय बिरखा सारु चेतायो है। कोटा, अजमेर, उदयपुर, जोधपुर अर बीकानेर संभाग मांय ई बारिश चालती रेहवण रो अनुमान है। लारला चौबीस घंटा मांय राज्य रा ऊगणी अर आतूणी हलकां मांय जोरदार पाणी बरस्यो। बांसवाड़ा मांय आज ही संवारे ऊँ ई बिरखा व्हे रही है अर माही बंधा मांय लगातार पाणी आ रह्यो है। भीलवाड़ा मांय ई छांटो-छिड़को व्हे रह्यो है। पाली ज़िला मांय सादड़ी, देसूरी अर नानबेड़ा समेत केई ठोड़ां लारला तीन दिन ऊँ रूक-रूक र मेह बरस रह्यो है। ज़िला रा जवाई बांध समेत न्यारा-न्यारा बंधां अर तळावां मांय लगातार पाणी आ रह्यो है। मौसम केन्द्र जयपुर रा निदेशक राधेश्याम शर्मा बतायो के काल राज्य रा 39 ज़िलां मांय बारिश रो यलो अर जालौर अर सिरोही मांय ऑरेंज अलर्ट जारी करी ज्यो है।

000